

Atham iaine ul woKurunthuc 2  
Atham ie'ra ammakka oPoluc pokurrinet  
ul wonoka'ran koKurunthuc  
**Lon lonothon**

Pul pothothilettat poIeccuo oPoluc pokurrinet ul wonoka'ran koKurunthuc atham enni, ikokat kittik noththok pAkia, akka kwokat nokathar akwothokatha nakin. Kwongkenet kin lon iloporot loIeccuo ana okin thangkathe ana kwittarathekin nthokatha nakin ana nthothilentheth kin atham, anaruk icci lon lo'rungekothaik ilokithak jakin. Ittina kwokurrathe atham enni akwittarot kin akin once'ret lon cik tothun akkwarthuk anthan.

Likkoik ere ul w'rek nti iul iocckothe lon loMiccie wokath aruket oPoluc itti kwokat cik akwo'rko akucci woul iocckothe lon loMiccie ana ikkre kwokat pannoka pul pothothilat poIeccuo. Iatham enni kwerethe ka kung kannan ana ngre ngothongkene lon iloporot iaKapik kakkarthok. Kwangkene ul iocckothe lon loMiccie thoporot thothittarat ul iocckothe lon loKapik nakucci ana ngre ngoul iocckothe lon loKapik na'ran w'rek (Ku'rathal 9-10).

<sup>1</sup> Lon elli naun oPoluc pul pothothilettat poMiccie oIeccuo ana llon ammakka Kapik kongothe ana lon napangkin oThimiththaoc, aloine ul iocckothe lon loIeccuo noka'ran koKurunthuc ana ul iupupure woKapik appik noththok poKrik.

<sup>2</sup> AKapik ongappa ponnon ana Ili oIeccuo oMiccie ethet non thoporot ana thomicco.

*Kapik ikonu thapiettot cik appik*

<sup>3</sup> Athopira noka noKapik ana oNgappa polli oLeccuo oMiccie, oNgappa iponu thiak ana ook Kapik kothapiet mīkīt cik llon appik, <sup>4</sup> ana ikapiet ton cik ilon lonnon ilamoloko appik, othakka itti aron antappapiet okkwion ithonu lon moloko nthapiettot cik itharon thoccot naak. <sup>5</sup> Ana ammakka oron thonu thaccokot thiak thoppot nti ilon loMiccie, ittina cakuruk oron thana thapiettot cik thoppot. <sup>6</sup> Amma onīn thaik thaccokot thiak, onīn thaccokot nti ilon lon anon apot cik ana anno'rettat, ana amma onīn thapiettathe mīkīt cik, onīn thapiettathe cik othakka itti annapiettat cik thapiettat cik ithanane non thocokot mīkīt ilon ana thonongkwot ilon nothiak then ithulukku ithanīn thaik thaccokot. <sup>7</sup> Ana tho'rikot cik thīn ianon tha'rungkwot cik, akka onīn thina itti ammakka oron thaik thaccokot thiak appik, ittina oron thapiettat cik appik.

<sup>8</sup> Pangkingon, onīn thongothe itti onīn thakwarikiet non thiak ithanīn thocokothe noththok pAccia. Onīn thocokothe thiak thrik kannan ana thokat thīmmin ana onīn thapukkathe ka ntit ana onīn thellakathe kīt kolon lothikkoik. <sup>9</sup> Īcarīcat, nomīkīt mīn onīn thokat ere onīn thakkmakot itti onīn thangutta. Anaruk elli lokat cik othakka itti anīn okorronno occot kīt noka kīn anaruk noKapik ikurokie ul illet. <sup>10</sup> Kwo'rethenīn nti ithio enthi ana kwa'ret nīn. Onīn thonekkethe tho'rikot cik thīn iaak ana kwa'rungkwot nan o'ret nīn cakuruk <sup>11</sup> ammakka onon thaik thittarat nīn ngnga'rama ngon. Ittina okin thoppot thapirane Kapik noka nti ianīn nolon iloporot ilettathenīn nti ia'rama ngoul woppot.

### *OPoluc paporto lon cik*

<sup>12</sup> Elli akka anīn ipot ka thoura ngngin, itti mīkīt mīn mi're itti thikkoik thīn cene nocapu ncik appik ana kannan ku'ri ikaron thonat ithun ikaat noKapik kokat

kupupure ana kella karra. Onin thokkothe ittina okorronno oka ammakka thinaik thonocapu anaruk ammakka thoporot thoKapik. <sup>13</sup> Akka onin thakorrrno okurrinenon lon ilanon thomma akkakkaro ana ina. Ana mpongothe ittina, <sup>14</sup> ana inakka onon thina lotteik onon thathina appik itti onon thipot ka thoura onin ngngin ammakka onin ipot ka thoura onon ngngin noca'ri colli oIeccuo.

<sup>15</sup> Akka mpokat pinat elli, mponekkethe lon cik itti mpathomirikot non cittokit othakka itti anon iot lon loporot arttot nan. <sup>16</sup> Mponekkethe lon cik itti mpathomirikot non amma aneo noththok poMakthonia ana amma anokkaprttako ntan, othakka itti annothiothin amma aneo noththok poIouthia. <sup>17</sup> Akka mpokkothe elli mpakannokkot nuthuk. Ana manna mpakorronno okkot ngkathar koul wonocapu othakka itti ani're itti, "ii" ana itti, "Aa" anopirie ul noka.

<sup>18</sup> Ana ammakka Kapik kakarrnammikkot, lon ilanin i'ret non lalakannoka itti, "ii" ana itti, "Aa" <sup>19</sup> Akka oIeccuo oMiccie ukul woKapik ianin therenet non lon len oun ana oCcalunac ana oThimiththaoc papakannoka itti, "ii" ana itti, "Aa" anaruk iaak laik itti, "ii." <sup>20</sup> Akka lantoka manna lon ila Kapik konekketheik, oIeccuo ngngin, laik itti ii iaMiccie. Ana ittina, oron thi'ret "Amin" ook ngngin aron ethet Kapik thr'ik. <sup>21</sup> Inenni Kapik akkapo'rieron than ilon loMiccie. Ana ook akko'rot ton ngaak, <sup>22</sup> akwonemat ton cik ana ethet ton Kanang kung nomikit monnon othakka itti akokene lon ilaik lanthan.

<sup>23</sup> Kapik kina nolon itti mpocottakot noththok poKurunthuc akain, laik itti amma mpokat peot ana nthacokot thiak kannan. <sup>24</sup> Onin thakarrnngkot itti onin thakkiet non lon ncik appik anaruk oron thareko tothun othakka itti anon opira noka akka thocokot lon nomikit thon akkaik thakorrrno anon opo'rathan.

## 2

<sup>1</sup> Ilen akka mpi'ren্থet ka kin itti mpakorronno ap-pokkaprttakinenon ntan akka anappipie non thiak. <sup>2</sup> Akka amma mpipiet non thaik, oththa akkapirien noka? Onon thulluk itha mpipiet thiak. <sup>3</sup> Ilen akka mpokurrinet non ammakka mpongothe othakka itti amma mpaat anokorronno ipo thiak nnul ionu itti wapirien noka. Mpina kicce itti onon appik tharon opira noka. <sup>4</sup> Akka mpokurrinet non lon elli, acikit cakannoka coporot kannan ana ngeme ikit ana okorronno oka itti anipienon thiak anaruk othakka itti annina itti mpongothenon kannan.

*Thocckarn্থet lon ilokithak*

<sup>5</sup> Amma opilin pipiet non thiak, kwakarrnnipien thiak ammakka kwipiet non appik, mpi'ret elli akka mpakar-rnnangkot itti mparttin্থet non nolon. <sup>6</sup> Lekkot nan itti thakkma ithanon thoppot thakkmarok thekkot naak. <sup>7</sup> Anaruk onon thonu itti onon thaccikinthok ana ap-ethok cik othakka itti akwokorronno ipo thiak kannan akwopa'ran্থet lon cik kirrkkir. <sup>8</sup> Ittina mpi'ret non itti nokorronnok akwina nan itti onon thongothok can-nan. <sup>9</sup> Lon ilokorronnorin anokurrinenon othakka itti anokatha itti amma onon akkaccokot cikit ithennekketta ana anon occikat lon ncik appik. <sup>10</sup> Amma onon thocckin-্থet opilin lon ilokithak, ana mpaccikinthok cakuruk. Ana amma lon l'rek laik itti mpaccikinthet opilin lon lung ilokithak, mpaccikinthok tokit koMiccie ana nti ilon lon <sup>11</sup> othakka itti apul pothopulut okorronno iot kathar ika akwarrot ton cik ngngin akka oron thina lon lung kicce.

*Thalkot cik llon loMiccie*

<sup>12</sup> Akka mpeot noka'ran koThthruac itti mpathongkene lon iloporot loMiccie than ana mpaththiat itti Ili wanyinin kathar, <sup>13</sup> mpokat parthuk pakannoka popirat noka akka mpakarrnniot opangkin oThiththoc than. Ana

mpi'rekathe itti mpei paeo ana mpoingkathe noththok poMakthonia.

<sup>14</sup> Anaruk athopira noka oka noKapik, ikitteron apinappin ere cungkut coul ialkothe cik oMiccie ngngin, ana okorronno aron opettot lon cik loMiccie na'ran appik ammakka waik ere amutha amma apettakot cik. <sup>15</sup> Akka oron thokanet Kapik ere amutha woMiccie iaik iul io'rettathe ana iul io'rettathe ana iul iurttatheik. <sup>16</sup> Nakkwion ithurttatheik, oron thaka ere amutha iangwo kin ana nakkwion itho'rettathe oron thaka ere amutha iakkiekin cik. Oththa akkekko nolon elli? <sup>17</sup> Oron thakorrrno oprtto lon loKapik llon l'rek ammakka opilinngon okkot anaruk oron there lon ilaik icat ngk'ran koMiccie tokit koKapik karkko ul iothilathe noKapik.

### 3

#### *Thonekkt lon cik thoKapik ithie*

<sup>1</sup> Oron thappropakkot nothipot ka thourai? Oron thongothe itti oron thakurrakine ana manna okurrine ul w'rek ka'ramacak aron okenekin itti oron oththani? <sup>2</sup> Onon ngka kon thaka'ramacak kin ilokurrakothie nomikit min ana ila ul wina nan appik ana ul wakkakkaro appik. <sup>3</sup> Onon thakene itti onon thaka'ramacak naMiccie ana onin akkothilathe ngngin, lakorrrno okurrako ngng'ri ngokalam anaruk ngKanang koKapik ikaik icat ana lakorrrno okurrakot na'raccak womothok anaruk na'raccak womikit moul ionyi.

<sup>4</sup> Onin thi're elli akka onin thonekktethe mikit noKapik oMiccie ngngin. <sup>5</sup> Onin thakorronnoka thinangka anin i're itti onin akkokkothe lon appik ngkakin anaruk Kapik akkokkiethenin lon appik. <sup>6</sup> Ook akkokorronnot nin anin okkot ngre ngothonekkt lon cik ilie ilella lon lothonce'ret lon cik anaruk ilokurrakot ngKanang ikupupure

koKapik akka ka'ramacac kothonce'ret lon cik kakkwot pul anaruk Kanang koKapik kethet pul thikkoik.

<sup>7</sup> Inenni amma lon lothonce'ret lon cik ilonat thio, ilokat lokurrakothe noka'raccak kopothok laat nthrik ana ul woIccereil wommakathe okatha oMucca toca akka thollio thothrik then ithintat cik <sup>8</sup> lon loKanang koKapik lakannoka nthrik kannan nenth'rei? <sup>9</sup> Amma lon ilangwo ul lonu thrük thena, lon ilakkie ul cik ioporot tokit koKapik lana thrük tharaththa? <sup>10</sup> Akka papu ipipe iponat thrük pella thrük ina amma oron arppithie thrük ithie itharrothe ithipe cik. <sup>11</sup> Ana amma lon ilintat cik laat nthrik, laka taththa nothrik tholon lothupuththuput.?

<sup>12</sup> Ana inakka oron thonu tho'rikot cik enthi, oron thella n're. <sup>13</sup> Oron thakorranno oka ammakka oMucca ipo'rumothe toca ngkret akka ul woIccereil imma thollio akka athintat cik. <sup>14</sup> Anaruk nyathe're nyen nyokat nyi'rimiettathe, manna inenni kret ken ko'rungkothe cik amma thonekket lon cik ithipe akkakkarako ntiatham wolon lothonce'ret lon cik. Kakorranno opa'retta cik akka oMiccie pulluk akkathopa're cik. <sup>15</sup> Ana manna inenni amma lon lothonce'ret lon cik loMucca laik lakkakkarako, kret ken ka'rumot mikit men. <sup>16</sup> Anaruk amma opilin poccokothe lon loMiccie, kret ken kapa'retta cik. <sup>17</sup> Inenni Ili oMiccie paKanang ana na Kanang kolli oMiccie kaik, n're nella. <sup>18</sup> Ittina oron appik ithakorranno o'rumakot toma ngkret thakene thrük tholli ana oron thathakka ere ook nthartakat nan thothrik ithanthan nolli iaKanang.

## 4

### *Tha'rthan thoKanang ikupupure*

<sup>1</sup> Inakka Kapik kethet ton ngre engi nthiak thung, oron thonu itti oron thakorranno apo ka ntit. <sup>2</sup> Anaruk oron thopa'rinet lon cik ilokithak ilakkattat thu'ran ana okorranno ere karra ana okucitto lon loKapik cik. Anaruk

amma oron ere lon ilaik icat ncinokkit oron thakene itti lon lonnon laik icat tokit koul ana koKapik. <sup>3</sup> Ana amma thongkene lon iloporot loIeccuo th'rek thaik thorukot ncik, tharukine ul iaik wurttat cik. <sup>4</sup> Pul pothopulut ili woul wothupulut wi'rïmiethe nyathe're nyoul iakorronno occokot lon loIeccuo othakka itti akin okorronno imma k'ran kolon iloporot oIeccuo ana lothrik thoMiccie ipungkwot Kapik llon appik. <sup>5</sup> Akka onin thaik thakorrno ongkene lon loka kin anaruk onin thaik thangkene lon loIeccuo oMiccie itti ook Ili ana onin itti ul iarekine non nti ilon loIeccuo. <sup>6</sup> Akka Kapik iki'ret itti, "ak'ran occie cik i'rïmak." kocciet k'ran kung nomikit monnon akethet ton k'ran kothina thrik thoKapik iaMiccie. <sup>7</sup> Ana oron thaik ere makkolok tulluk imanneko tha'rthan thoKanang ikupupure alokene itti pu'ran empi ipaca polon appik paat noKapik ana okorronno oka nanin. <sup>8</sup> Oron thaik thaccokot thiak llon appik anaruk oron thakarrnalkakot ana oron thommat itti oron thakkot tat anaruk oron thakarrnapo ka ntit <sup>9</sup> oron thokkietathe thiak, anaruk Kapik kakannothe naron, oron thopokot anaruk oron thakannille. <sup>10</sup> Oron thonu thio thoIeccuo noka konnon appinappin othakka itti athikkoik thoIeccuo ittako ncik iaron. <sup>11</sup> Akka oron ithaik ngkit thapat thillet nti ilon loIeccuo othakka athikkoik thung ittako ncik ika konnon kopul iponyi. <sup>12</sup> Ittina thio thaik ianin anaruk thkikoik thothuput thuput thaik ianon.

<sup>13</sup> Lokurrakot itti, "Mpoccoke the lon loKapik nocikit ana ilen akka mperenet." llon len ilulukku lohocokot lon loKapik nocikit oron cakuruk thaccokot lon loKapik nomikit ana erene <sup>14</sup> akka oron thina itti okkwi ipurokiet Ili oIeccuo nti ithio purokweron cakuruk oron oIeccuo akwonekat nin ana onon tokit kung. <sup>15</sup> Elli

appik lorkattathe nti ilon lon othakka itti aul woppot ina thoporot thoKapik akin opiranok noka ana omerekethok. <sup>16</sup> Ittina oron thakorrno apo ka ntit. Antoka manna itti thikkoik thonnon thaik thintat cik anaruk Kanang koKapik ikaik iaron kathakka kie appinappin. <sup>17</sup> Akka thiak enthi thotte itharon thaik thaccokot thakuccenthet ton thrük thothupuththuput ana ithakorrno aron ure nothocokot thiak thonnon. <sup>18</sup> Ittina ton okorrorno occot kit na'rupu iimmakot anaruk na'rupu iakirrnimmako. Akka a'rupu iimmakot wintat cik anaruk a'rupu iakirrnimmako wa'rungkwot cik thupuththuput.

## 5

*Ka ikie*

<sup>1</sup> Inenni oron thina itti amma kaman konnon konocapu ikaron thaik tit kokittakot, oron thonu kaman noKapik kothupuththuput tothi'rot ikakarrnnunta nyaun nyoul ionyi. <sup>2</sup> Noma'ri imaron thaik nocapu, oron thaik thakwancot kathar ikaron eo tothi'rot ngngin, <sup>3</sup> akka amma oron thiothe kathar ikaron eo ngngin tothi'rot, oron thana thikkoik. <sup>4</sup> Akka noma'ri imaron thaik icü'rük enci, oron thaik thakwancot kathar ikanekot ton tothi'rot, akka oron thakarrnnangkot thikkoik cene nocapu anaruk oron thongothe itti oron thana thikkoik thorithi'rot, akka oron thongothe itti oron thakucitto ka engki ngka ikakinnio kirrkkir. <sup>5</sup> Ittina Kapik akkocuccenthet ton lon len ana kethet ton Kanang kung kolon len ikakene lon ilaik lanthan.

<sup>6</sup> Ittina oron thina ana onekket mikit nolon itti inakka oron thaik ngka engki konocapu oron thaik ciththan noli. <sup>7</sup> Oron thaik thikkoik nthocokot lon loKapik nomikit okorrorno oka nthimma lon ngkit. <sup>8</sup> Mpi're itti oron thina lon len, ana mpongoghe itti mpapa'roik nti ika engki aneo tuan nalli waik. <sup>9</sup> Ittina oron thonu itti oron thapiriek noka antoka manna itti oron thaik ngka konnon naak ana



manna oron thaik ciththan naak. <sup>10</sup> Akka oron thonu itti oron thaco'ro tokit koprruk poMiccie pothakkma othakka itti akwakkmat ton nolon ilaron thokkothe kurekkurek akka oron thokat ngka konocapu, antoka manna itti lokithak ana manna itti loporot.

*Thopakkot iku'ri ngKapik*

<sup>11</sup> Ana inakka oron thina p'r'in itti thopellene Ili thonu itti ngimpen, oron thonu itti oron thangkene ul w'rek cakuruk. Anaruk Kapik kinaron kicce ana mpongothe itti onon thina nan cakuruk nomikit mon. <sup>12</sup> Ittina onin thaik thakorronno ipot ka thoura attang anaruk onin thaik thakene non lon ilanon ipot ka thoura nolon lin ngngin othakka itti annina akka annothinthet ul tit ipot ka thoura nolon ilimmakot ana okorronno oka nolon ilaik nomikit. <sup>13</sup> Ana amma onin akkonu urrut katha onin thonu urrut nti ilon loKapik ana amma onin akkoporot onin thoporot nti ilon lon. <sup>14</sup> Thongat thoMiccie akkocokotheron akka oron thina nan itti pul pulukku piot nti ilon loul woppot ana ul woppot willet nti ilon lung cakuruk. <sup>15</sup> Ana kwiot nti ilon loul appik othakka itti aul iaik okorronno okkine ka ken cik anaruk akin ikkoik nti ilon lokkwi ipiot ana urukwo nti ilon len.

<sup>16</sup> Ana nciki inenni oron thakannocot kit nopul p'rek ponocapu. Ana amma oron akkakinat oMiccie ngkathar kolon lonocapu anaruk oron thakinninak inenni ngkathar ken. <sup>17</sup> Ittina amma opilin paik ilon loMiccie kwothakkat pie p'r'in, thikkoik ithipe theot ncik p'r'in ana ithie akkopakkotheik. <sup>18</sup> Elli appik laat noKapik ikopakketheron iku'ri oMiccie ngngin ana kwekatheron lon lothopakket ul w'rek iku'ri, <sup>19</sup> Kapik kokat akokkot ku'ri ncapu ncik appik oMiccie ngngin ana kakorrno occat kit nolon ilokithak len. Ana kometheron itti oron thakene ul cakuruk lon lothopakkot iku'ri. <sup>20</sup> Ana ittina onin thaul iere lon loMiccie ana Kapik ngka kung kokat

akere llu're lin. Ittina onin thamet non ngk'ran koMiccie itti nthapakkot iku'ri ngKapik. <sup>21</sup> Kapik kothikkiet okkwi ipella lon ilokithak cik ponu lon ilokithak nti ilon lonnon othakka itti aron othakka thoporot tokit koKapik.

## 6

<sup>1</sup> Ammakka ul iorekinet Kapik, onin tha'retto nanon itti nthakorrnnoocco thoporot thoKapik ella lon cik. <sup>2</sup> Akka kwi'ret itti, “Noca'ri ica mponu itti mpaccikot non, mpoccikothenenon, Ana noca'ri cotho'rettat mpittarothenenon.”

Mpi'ret non itti ca'ri enci icaKapik ona thiak thonnon nan, ana ca'ri enci icaKapik o'retton nan cakuruk.

### *Thokinya thoPoluc*

<sup>3</sup> Onin thakarrnnangkot itti onin thalikine opilingon cik llon l'rek othakka itti akka angre ngin oka ngokithak. <sup>4</sup> Anaruk ammakka ul iarekine Kapik onin thakene llon appik itti onin thaul iarekine Kapik nthocokot cikit ilon ilonthomat ana amma lon lalkothenin ana onin thomma akka anin okkot, <sup>5</sup> ammakka itti opoko ana oka ikorrkkor ana amma cungkut coul othatto ianin ana amma ngre ngonthomat ana amma onin thomma ointhe ana amma onin thiamat, <sup>6</sup> ana amma onin angwot ka kin thupupure ana ina lon, ana amma onin occokot cikit ilon ana ithoporot ana iKangang ikupupure ana ithongarot icaricat, <sup>7</sup> ana ithere lon ilaik icat ana ipu'ran poKapik ana nthoporot thokkun wothothari ana wothokure, <sup>8</sup> ana ithrik ana ella thothiakine cik ana ntherettat llon lokithak ana ntherettat llon loporot ncinomun alokathako ere lom-mako, <sup>9</sup> ana amma onin thinakot ana icci ere inthomakot ana amma onin thaik ngkit thapat ana icci onin thillet ana amma onin thopokot ana onin thakinnille, <sup>10</sup> amma

onin thaik nothiak anaruk anin thopirat amma onin thella a'rupu cik anaruk anin othikkie opilingon a'rthan ana amma thella a'rupu cik anaruk anin thouu a'rupu appik.

<sup>11</sup> Ul woKurunthuc, onin there net non ella n're ana onin thanynthet non mikit min cik. <sup>12</sup> Onin thakorronno oki'rat nothongat non anaruk onon akkoki'rathe nothongat nin. <sup>13</sup> Mperene non ammakka anerene nyukul nyin. Nokkinthet nin lon ammakka onin okkinthet non, nanyinthet nin mikit mon cik cakuruk.

*Tupan toKapik iraik icat*

<sup>14</sup> Nokorronno oka tothun nul iakorronno occokot lon loleccuo oMiccie. Lon liatha ilaul iokithak ana ioporot tokit koKapik wonu ithun? Ngintha akka ngi'r'imak ngonu ithun akin ok'ran kocingki? <sup>15</sup> Lon liatha ilaik tothun loleccuo ana lopul pothopulut? Ana ngintha akka pul ipoccoke the lon loleccuo ana ipakorronno occokot lon loleccuo thouu ithun? <sup>16</sup> Ngintha akkungkarot tupan toKapik ana 'ran worinikillan? Akka oron tharupan toKapik iraik icat. Ammakka Kapik ki'ret itti, "Mpikkoik iakin ana onyaro iakin ana mpaka Kapik ken ana okin thaka ul win."

<sup>17</sup> Ilen akka Ili wi'renet itti, "Ittina nopa'roik nti iakin ana opa'rinekin cik,

Nokorronno othonto a'rupu wen wolon ilokithak, ana mpikkienon cik naun."

<sup>18</sup> Ili ialkothe cik wi'ret itti, "Ana mpakanenon oththe pon ana onon thakanin nyukul nyin inyomura ana inyari."

---

6:16 6.16 Lauin 26.12; Armia 32.38; Icikkial 37.27      6:17 6.17 Iccaia 52.11; Icikkial 20.34, 41      6:18 6.18 2 Camuil 7.14; 2 Camuil 7.8

## 7

<sup>1</sup> Opuruko pingon, inakka oron thouu thonekket lon cik noKapik enthi ton othikkie ka konnon ana kanang konnon ko'rillir nolon appik ilokithak, ton oka thupupure kirrkkir ana ona n're noKapik.

*Thopira noka thoPoluc*

<sup>2</sup> Nokkinthet nin ka'ran nomikit mon. Onin thakorronno okkinthet opilin lon l'rek moloko ana onin thakorronno opa're opilin cik nothocokot lon nocikit thung ana manna onin thakorronno onekot opilin a'rupu ngkarra.

<sup>3</sup> Mpakanni're elli othakka itti anorukwet non llon l'rek, anaruk ammakka mpi'rethenon itti onon thaik nomikit min ana oron thakkoik ana manna ille oron aththut.

<sup>4</sup> Mponekkethe cikit nanon ana mpipot ka thoura onon ngngin. Mpopirat noka nanon akka onon therekethin, ilon lin appik ilokithak thopira noka thin thomma oco'ro.

<sup>5</sup> Manakka onin thaat noththok poMakthonia ka kin engki kakorronno apikot aththik anaruk onin thokat thommiettat llon loppot ilokithak. Ngkwaccikot aul othatto thapat ana n're ianin.

<sup>6</sup> Anaruk Kapik ikapiet ul cik irrot mikit nti ikarak kapiethenin mikit cik nthao thoThiththoc

<sup>7</sup> ana okorronno oka nthao thung tulluk anaruk nthapiet cik ithanon thapiethok cik. Kwi'rethenin itti onon thongothe itti nthiman ana thiak thon ana thokuccekot cik itti ntharettinin othakka itti athopira noka thin oka thrik kirrkkir.

<sup>8</sup> Antoka manna itti ka'ramacac ika mpothiothe kuethenon ka cik anaruk mpella kit ken. Antoka manna itti mpella kit anaruk mpakathe itti kuet non ka cik papotteik.

<sup>9</sup> Ana icci mpopirat noka annoka itti akka mpuethenon ka cik anaruk akka onon thuat ka ana thua ka thon thokorronnot non annopa'rine lon cik ilokithak. Akka onon thokat thuaka ammakka Kapik konekketheik ana ittina onin thakinneikat non ka

kongo. <sup>10</sup> Thocokot thiak ithao noKapik thaprttarok nti ilon ilokithak ana thanarne tho'rettat anaruk thocokot thiak thonocapu thanarene thio. <sup>11</sup> Nantokatha tat akka thuaka ithaat noKapik thokkothe ianon, thokorronnot non annokkot lon icaricat ana thongat itti nthakkot lon kicce ana nthokenet itti onon thella lon ilokithak ana thokuccekot cik ana thokwancot lon ilanon thongothe, ana onon thokenet itti onon thongothe itti lon lakkattat ella thokwiattat. Ana ilon appik onon thokenet itti onon thella lon lokithak ilon elli appik.

<sup>12</sup> Ittina mpantoka manna itti mpokurrinet non atham, mpakorronno okurrine okkwi ipokkothe lon lokithak ana manna mpakorronno okurrine okkwi ipettathe lon moloko anaruk othakka itti anokene itti onon tharat tokit koKapik ana itti onon nthokkinthet nin lon iloporot tat.

<sup>13</sup> Ilon elli appik oron thopo'riettat than.

Nothopo'rietta than enthi, onin thokat thopirat noka ngkathar pellek akka onin thimmat oThiththoc popirat noka akka onon appik thopo'rienok noka Kanang kung than. <sup>14</sup> Mpipothenen ka thoura ngngin tokit kung ana onon thakorronno othien cik. Anaruk ammakka lon ilanin therntet appik lokat icat, ittina thipot ka thoura thin onon ngngin tokit koThiththoc thaik icat cakuruk.

<sup>15</sup> Ana thongat thung tharttakot nan, amma akwokwarttikot akka onon thokat annocikot lon lung appik ana tat akka onon thikkierok cik nthothianok cik. <sup>16</sup> Mpopirat noka akka mponekkethe cikit cin nanon kirrkkir llon appik.

## 8

### *Tha'rntot thoul iocokothe lon loIeccuo*

<sup>1</sup> Pangkingon, onin thongothe itti onon thina lon lothoporot thoKapik itha kethet ul iocokothe lon oIeccuo noththok poMakthonia. <sup>2</sup> Nothocokot thiak then

cannan, okin thokat thopirat noka kannan ana antoka manna itti okin thokat thellat a'rupu cik, okin thokat akin ikket ul a'rupu nuthuk. <sup>3</sup> Akka mpere lon ila mpimmat ngkīt itti, okin thakarrnna'rntat a'rupu iakin thekkot nan tulluk itti okin tha'rntot anaruk okin tha'rntathe arttot nan thellek. <sup>4</sup> okin thipittathenīn puccupuccuk itti onīn thakorronnokin akin ittarot ul iupupure woKapik na'rupu. <sup>5</sup> Ana okin thokkathe lon arttot nan nolon ilanīn thokat thonat, cittokīt okin thangothe itti okin thaccikot lon loIli oIeccuo ana līn ana ongat itti okin thakkot lon ila Kapik kongothe. <sup>6</sup> Ittina onīn thaatakīekathe oThithhoc cik itti kwainenon akwathomartto ngre ngothoporot iakwappoku'ret ncik cittokīt nti ianon. <sup>7</sup> Ana ammakka onon thokkothe lon loporot kannan llon ncik appik ammakka itti, thoccokot lon loKapik nocikīt ana ithere lon ana nthina lon ana thokkot lon icarīcat ana ithongat nīn, ngonomartto thoporot thothethet ngkathar ikoporot cakuruk.

<sup>8</sup> Mpaik pakorronno erenenon lon lonthomat anaruk mpongothe itti mpenneke thongat thon ithaik icarīcat nthokkot ngre icarīcat ngopilingon. <sup>9</sup> Ana onon thina thoporot thoIli oleccuo oMiccie itti kwokat papa'rthan anaruk kwothakkat paraco nti ilon lon othakka itti nthothakka paraco thung annothakka tha'rthan. <sup>10</sup> Nokatha thocimitto thin itha anocimittonon ngngin ithoporot nanon, nuthuput itheot onon thokat cittokīt okorronno oka tulluk itti annethet anaruk nthongat itti onon thakkot lon len. <sup>11</sup> Nocothot ngre inenni othakka itti athocothot oka ammakka lon lon ilanon thonu nomikīt. <sup>12</sup> Akka amma thongat itti ngkwakkot lon thaik, tha'rntot thangkakot nolon ila pul ponu ana okorronno oka nolon ila pul pakorronnoka ponu. <sup>13</sup> Onīn thakorronnoka thangothe itti onīn thapirie ul w'rek noka anon thaik thaccokot thiak anaruk othakka itti alon ekkarne.

<sup>14</sup> Inenni onon thonu a'rupu woppot, ana onon thonu itti nthittarot okkwion ithella a'rupu cik akka ca'ri c'rek, okin thana a'rupu woppot ana okin thittarot non amma onon thella a'rupu cik. Ittina lon laka lekkaranet. <sup>15</sup> Ammakka lokurrakot itti, “Okkwi ipa'rntothe a'rupu woppot, pellat a'rupu woppot anaruk okkwi ipa'rntothe a'rupu wotteik, pakorronno ona a'rupu wotteik.”

*OThiththoc pothilathe noka'ran koKurunthuc*

<sup>16</sup> Mpopirat noka noKapik ikonekkenthet oThiththoc lon nocikit ila mpongothenon ngngin. <sup>17</sup> Ana oThiththoc pakorronno oka tulluk itti kwothiothe ilon lin ila onin thipittothok itti kwakkot anaruk kwongothe nci nocikit cung kannan itti kwanthan ana manna kwaik painenon ngka kung. <sup>18</sup> Ana onin thaik thathiot opang ponnon ipa ul ioccoke the lon loleccuo wongothe ngre ngung ngothorekine lon iloporot loleccuo akin aththut. <sup>19</sup> Iloporot kannan itti ul ioccoke the lon loleccuo akkethet nin ngok itti akwittarot nin nokurtti kin nore engin ianin thaik thakkot, anin othiane Ili cik ana okene itti onin thongothe itti onin inthareko. <sup>20</sup> Onin thongothe itti intha'rumo nore engi othakka itti apul p'rek ella iparukwet nin ngkathar ikanin thaik thakkot ngre engi ngotha'rntot akucci okorronno oka mpu'ran. <sup>21</sup> Akka lon lin itti onin thakkot iloporot annoka tokit koKapik tulluk anaruk tokit koul appik cakuruk. <sup>22</sup> Ana onin thaik thathiot kin okin opang ponnon ipanin thennekket ma'ri moppot ana onin thiothok itti kwopo'rot than llon loppot ana inenni kwonekkethe cikit nanon kannan nolon lon. <sup>23</sup> Anaruk oThiththoc ook opurukwo pin ana ipaik pareko ianon ana opangan thonnon th'rek okin thaul ioccoke the lon loleccuo wothiothe ana okin thathiane oMiccie cik. <sup>24</sup> Ittina nokene ul wen thongarot thon ana lon ilanin

thaik thipinthe non ka thoura ngngin othakka itti aul ioccoke the lon loIeccuo ina nan.

## 9

*Tha'rantot ithaine ul ioccoke the lon loIeccuo noka'ran koU-rucelim*

<sup>1</sup> Lon lella ilakorronnon anokurrinenon lon lothittarot ul iupupure woKapik. <sup>2</sup> Akka mpina kicce itti onon thongothe kannan itti onon thittarot ana ilen akka mpipothe non ka thoura ngngin tokit koul woMakthonia, ani'ret kin itti, nci nothuput itheot onon noththok poKrik thokuccekotheik itti onon thittarot ana lon lon elli lokorronnot kin akin ongat kannan itti okin thakkot ngre ngen. <sup>3</sup> Anaruk mpaik pathinthe non opang ponnongon othakka itti athipot ka thoura thin onon ngngin, okorronno oka thella lon cik anaruk othakka itti anon okuccekot cik ammakka mpi'ret itti onon thaka. <sup>4</sup> Akka amma pul p'rek noul woMakthonia pomakothin mono apothiot anon thakorronno okuccekot cik ana onin thathiettaik anaruk onon thathiettaik kannan akka onin thokat thonekkethe cikit nanon itti onon thokuccekotheik. <sup>5</sup> Ilen akka mpothinthe opang ponnongon tokit kin akin othomartto lotha'rntot thon thothittarot ithanon thi'rethin ngngin. Othakka itti athokaik itti onon akkokuccetheik ana okorronno oka itti nthonemittathe nan itti onon tha'rntot.

*Thee more ngkathar ikoporot*

<sup>6</sup> Nokwarttikot itti, okkwi ipee more momil motte, pakio mil motte, ana okkwi ipee more momil moppot, pakio mil moppot. <sup>7</sup> Pul ponu itti pethet a'rupu iakwi'ret nci nocikit itti kwethet okorronno oka itti pul p'rek ponemothok nan akka Kapik kongothe pul ipethet a'rupu nci nocikit nthopira noka. <sup>8</sup> Ana Kapik kethung thoporot appik, othakka itti aana a'rupu iekkot naung



ana amma ngkwonu a'rupu iekkot naung appik ngkwakkinthet opilingon lon loporot. <sup>9</sup> Ammakka lokurrakot itti,

“Kwethet ul a'rupu iellaik ncikit coporot,  
thoporot thung thakorrno omattat  
thupuththuput.”

<sup>10</sup> Ana Kapik ikethet ul more ma'rupu ieera ana thu'rit ithartta kethet non ana arttinthet non nomore ma'rupu ieera ana othikkie thoporot thang tokit koKapik thrük.

<sup>11</sup> Ngkwathikkietta pa'rthan llon appik othakka itti athakka poporot nolon appik ana onin ngngin thoporot thang thaka thopirane Kapik noka.

<sup>12</sup> Ngre ngang engi iangkwaik pakkot, ngaik ngakorrno okinthet ul woKapik lon ilakin thongothe tulluk anaruk ngaik ngakorrno okin akin opirane Kapik ngkathar koppot. <sup>13</sup> Ana nti ilon lore ianon nthokkothe, nthokenet ngka kon, ul wapirane Kapik noka nti ithocikot lon thon ithakene thocokot lon nomikit thon tholon iloporot loleccuo oMiccie ana thethet kin a'rupu ana ul appik. <sup>14</sup> Ana ia'rama ngen iakin a'ranung, mikit men maka mopirat noka naung nothoporot thoKapik cannan ithaik iaung. <sup>15</sup> Ton opirane Kapik noka nothoporot thung ithakorrno ongantetta.

## 10

### *Throt thoPoluc nore ngung*

<sup>1</sup> Oun oPoluc llon ica ana nthoporot thoMiccie mpipittot non lon, oun ipothiat cik tokit kon anaruk mpere ncinokkit amma mpaik prek. <sup>2</sup> Mpipittot non itti amma mpainet non mpakarrnerenenon ncinokkit ammakka mponu itti mpaakat noul w'rek iapri oron thakkoik llon lonocapu enci. <sup>3</sup> İcat oron thaik cene nocapu ncik

anaruk oron thakorrrno orrot nolon lonocapu ammakka ul wonocapu okkot. <sup>4</sup> A'rupu ianin orro ngngin wakorrn-noka a'rupu wonocapu. Anaruk wonu pu'ran porothi'rot apokitto lon ilonthomat. <sup>5</sup> Onin thakitto lon appik ilaik lalikine ul cik itti wina lon loKapik. Onin thaprtto lon len cik akin occikot lon loMiccie. <sup>6</sup> Ana amma ngkwocckithe lon loMiccie p'rin, onin thakkma okkwion ithakorronno occikot lon loMiccie. <sup>7</sup> Onon thaik thakathacce a'rupu nthapat tulluk. Amma opilin ponekkethe cikit nolon itti ook poMiccie kwonu itti kwina cakuruk itti onin thoMiccie cakuruk ammakka ook poMiccie paik. <sup>8</sup> Ana mpantoka manna itti mpaik pipot ka thoura nongili ialli wethet nin. Anaruk ngili ngin ngupothonon ngakanno opakket non nocapu. Ittina mpakorronno othiaik itti mpareko ngngili ngen. <sup>9</sup> Mpakarrnangkot itti mpipienon n're ngka'ramacak kin engki ika mpothinthet non. <sup>10</sup> Akka opilingon thaik thi're itti, "Ka'ramacak koPoluc konthoththomat ana konu pu'ran tit anaruk amma kwaan cene ngka kung akworronno ere mpu'ran ana lon lung ella lon cik." <sup>11</sup> Ul ammakka enni wonu itti wina itti onin theret lon ika'ramacak ana amma onin thaat anin thakkot ngre ncinokkit.

<sup>12</sup> Onin thakannangkot itti onin thungkwie ka kin nul iungkie ka ken mpangkan. Amma akin arppippithie ka ken ngka ken ana ungie ka ken ngka ken okin thakorronno oka thinaik ntica. <sup>13</sup> Anaruk onin thakannipot ka thoura na'rupu ianin thakorronno okkot mpu'ran pin. Anaruk onin thipot ka thoura ngngre iaKapik kothiothenin itti onin thakkot, ammakka ngre iaron thorekot aththut. <sup>14</sup> Onin thaik thakorrrno ipot ka thoura kannan onin thaik thakorrrno arrot ka'ran kin cik, ammakka lokat cik lathoka amma onin thokat thakorrrno ainenon. Onin thainet non llon iloporot loMiccie. <sup>15</sup> Onin thakorronno ipot ka thoura ngngre iokkattathe nul w'rek anaruk

onin thongothe itti thocokot lon nocikit thon tharttakot nan, angre ngin appaththat cik ianon <sup>16</sup> othakka itti anin othongkene lon iloporot loleccuo na'ran w'rek iccik kon. Akka onin thakorrrno angkot itti onin thipot ka thoura kore iokkattathe noka'ran k'rek nul w'rek. <sup>17</sup> Anaruk, "Okkwi ipongothe itti kwipot ka thoura, akwipot ka thoura llon lolli." <sup>18</sup> Akka okkwi ipamereket ka kung pakorronno oka poporot, anaruk okkwi ipa Ili omereket ook akporot.

## 11

### *OPoluc ana ul wothonilettat ngkarra*

<sup>1</sup> Mpongthe itti onon thaccokot cikit ilon papotte ithommaik thin, onon thocokothe ntit. <sup>2</sup> Mpo'rianet non ntho'ria ithoporot thoKapik. Mponemintet non pul pulukku ana ook oMiccie ere ukul ioi're ionemittanthe olle itti witta. <sup>3</sup> Anaruk mponu n're akka annopa're ma cik nolon ilaik icat loMiccie karkko Aua ipa pinyil pam-mikkothe mono apopa'rekathok ca cik ngkarra. <sup>4</sup> Akka amma opilin paat mono akwongkene lon loleccuo nolon loleccuo ilanin thongkenet non lon len, ana manna amma onon thocot kanang k'rek nokanang ikanon thocot ana manna lon iloporot loleccuo nolon loleccuo ilanon thangkotho, onon thangkot accokkot. <sup>5</sup> Mpakatha itti mpakorronno oka potteik llon noul wothonilettat ittittik ngkarra. <sup>6</sup> Mpantoka pakorronno ongkenetta itti mpere tat, anaruk mponu thina cik. Ana elli lanon thina akka onin thokenet non ma'ri moppot nathar kurekkure.

<sup>7</sup> Lokat lon ilokithak itti mparpet ka kin cik othakka itti anoku'ret non kapik nthongkenenon lon iloporot loleccuo ella manna akucci? <sup>8</sup> Mpokwithe ul iocokotho lon loleccuo na'ran w'rek nthonekot kin akucci othakka itti

anathorekinenon ngngin. <sup>9</sup> Anakka oron thokat aththut mponat thiak tha'rupu anaruk mpakannomie pul p'rek, akka opang ponnongon ithaat noththok poMakthonia thittarathin na'rupu ia mponat thiak then. Mpo'rumot nan itti mpakorronno ommie pul p'rek ana mpa'rungkot nan okorronno ommie pul p'rek. <sup>10</sup> Ana ammakka lon loIeccuo ilaik icat ilaik iaun, pul pella noththok poKrik pace'ren nothipot ka thoura nolon elli. <sup>11</sup> Akaintha? Akka mpongothe non? Ana Kapik kina itti mpongothenon.

<sup>12</sup> Ana mpa'rungkot nan okkot lon ila mpaik pakkot anoce're okkwion ithaik thipot ka thoura itti okin thiak thakkot ngre ammakka oron thiak thakkot. <sup>13</sup> Ul iammakka enni waul wothothilettat ngkarra ana okin ul innikot itti okin ul wothothilettat woMiccie. <sup>14</sup> Elli lakorronno oprttakiettot tit akka pul pothopulut cakuruk pinnikot itti pa'rupa wothothilettat wok'ran ikaccieik. <sup>15</sup> Lakorronno oprttakiettot tit amma ul iarekinok winnikot itti woporot tokit koKapik. Ca'ri canthan icakin ocothakot ngkathar ikakin thouu itti okin thacothakot ngngin.

### *OPoluc pipot ka thoura nothoccokot thiak thung*

<sup>16</sup> Mpappopakenthet non tit itti, nokorronno ome itti mpommaik nti ica. Anaruk amma onon thakathan ere mpommaik nongathin ammakka pul ipommaik othakka itti aniot lon lotte ilanipot ka thoura ngngin. <sup>17</sup> Nthipot ka thoura, mpaik pakerrnnere ammakka ili ere anaruk mpaik pere ere pul ipommaik. <sup>18</sup> Inakka ul woppot waik wipot ka thoura ngkathar ika capu ncik appik okkot, mpipot ka thoura cakuruk. <sup>19</sup> Onon thakatha ka kon itti onon thinaik anaruk onon thiak thaccikot lon loul iommaik. <sup>20</sup> Ilaik icat itti onon thiak thaccikot lon loul iakkiet non thiak ana iammikkot non ana iarekienon llon

appik ana iakkwenon thounu nattal. <sup>21</sup> Mpothiat cik i're itti onin thokat thommangka llon elli.

Mpaik pere ere pul ipommaik, lon ila apilingon thongothe itti okin thipot ka thoura ngngin, mpongothe itti mpipot ka thoura ngngin cakuruk. <sup>22</sup> Okin thaul wolpranini? mpapul polpranin cakuruk. Okin thaul wolccereili? mpapul polccereil cakuruk. Okin thathiki thApreini? mpapiki pAprein cakuruk. <sup>23</sup> Okin thaul iarekine oMicciei? (mpaik pere ere pul iponu purrut) Anaruk mpapul iparekine oMiccie kannan nakin. Mpokat ikorrkkor ma'ri moppot ana mpopokot kannan ana mpokat ere mpakkuttat attang ana attang. <sup>24</sup> Ul wolouth wokkwerin ma'ri ukuluk kurekkurek ua arrial ana attul ana ikken ukulaco'rin. <sup>25</sup> Ul woRumanin wokkwerin ma'ri m'rapuruk nurrong ittittik ana u'runcakot cik ca'ri culukku mmothok ana kuppurung konoi'ri kocottathin ngngin irok ma'ri m'rapuruk ana mpikkatheik irok irapngka nokkonokki ana nokk'rokk'ra <sup>26</sup> mponyarot nokurtti koppot ana kukkwit kukkwit. Nok inapangka nokkothin lon lokithak ana ul wolu'ran ialikine ul cik ikathar wokkothin lon lokithak ana ul win wonoththok pin wokkothin lon lokithak ana ul iakonoka wolouth wokkothin lon lokithak ana mpokkattathe lon lokithak nan noka'ran kin ana mpokkattathe lon lokithak nan noththok pin ana mpiothe lon lokithak nonue ana mpokkattathe lon lokithak nan opangkingon ngngin ithonu karra. <sup>27</sup> Mporttekot ana okinya anganna ana mpakannoincicce inthe ana ti tokkuttethin ana pica ana kanang kannan ana mpokkat cunthut. <sup>28</sup> Ana nolon elli appik, lon l'rek ilo'rothin cik lokat loul iocckothe lon loleccuo na'ran appik. <sup>29</sup> Oththa akkapot ka ntit ampakannapo ka ntit? Oththa akkopa'rettat cik nti ilon iloporot ampakanua ka ci noucce?

<sup>30</sup> Amma mponu itti mpipot ka thoura ana mpipot ka thoura llon ila mpommangka ngngin. <sup>31</sup> Kapik oththan polli oleccuo, ipirakine noka thuput thuput pina itti mpaik pakannammikkot. <sup>32</sup> Noka'ran koThimacakka ili iotte iokat ikkun woili irik Arththac ponekkethe ul iangwot cik itti wangwot othakka itti accokothin <sup>33</sup> Anaruk opangkinngon ilon loKapik thonekkethin ialnthung, akin orrepekathin okkien norttu anokkat cik nti inyaun nyen.

## 12

### *Thathantako thoPoluc*

<sup>1</sup> Mponu itti mpa'rungkwot nothipot ka thoura antoka manna itti papella ipincat nan, mpa'rungkwot nan ere lon lothathantako ana thittako ncik itha illi wittinin ncik. <sup>2</sup> Mpina pul p'rek ipocckothe lon loMiccie iponekittathe tothi'rot ira'rapuruk noluput ileot ncik attul ana ikken koco'rin, mpomma amma kwonekittat ngka kung ana manna okorronno oka ngka kung mpomma, Kapik kulluk akkina. <sup>3</sup> Ana mpina itti pul pen ponekittathe tothi'rot antoka ngka kung ana manna okorronno oka ngka kung mpomma, anaruk Kapik kina. <sup>4</sup> Ponekittathe tothi'rot ana pocckothe lon ila pul iponyi ponu itti pakorronno ere lon len. <sup>5</sup> Mpipot ka thoura nopul ammakka pen anaruk mpakarrnnpot ka thoura noka kin, anaruk mpipot ka thoura nolon ila mpommangka ngngin. <sup>6</sup> Ana amma oun akkongothe itti mpipot ka thoura, mpakorronno oka pommaik akka mpaik pere lon ilaik icat. Anaruk mpakorronno ipot ka thoura akka opilin i're itti mprik nolon ila mpaik pakkot ana ere. <sup>7</sup> Antoka manna itti mpoccot thittako ncik tholon noKapik, mio mok'rellorin nti ikkwa, pul pothilatthe nopul pothopulut apathocckoiethin thiak othakka itti anokorronno ipot ka thoura. <sup>8</sup> Mpipittothe Kapik ma'ri m'rapuruk itti kanekothin pul

pothopulut pen. <sup>9</sup> Anaruk ki'rekathin itti, "Thoporot thin thekkot naung, akka pu'ran pin pareko anganna iul iommangka." Ittina mpopirat noka itti mpipot ka thoura nothommangka thin othakka itti apu'ran poMiccie o'ro naun. <sup>10</sup> Ilen akka mpopiranet noka nothommangka thin ana amma ul ocungkwon ana occokiethin thiak ana attan ana ilon ilonthomat nti ilon loMiccie. Akka amma mpommangka, ampopo'rot than.

*oPoluc pongothe ul woKurunthhuc*

<sup>11</sup> Mpothikkiet ka kin pommaik anaruk onon akkoko-rronnorin anothakka ittina. Onon akkira aththerenin llon loporot, akka mpakorronno oka potteik llon noul wothothilettat innikot itti woporot kannan, antoka manna itti mpapul nuthuk. <sup>12</sup> Mpina pul p'rek ipoc-cokothe lon loMiccie iponekittathe tothi'rot ira'rapuruk noluput ileot ncik attul ana ikken koco'rin, mpomma amma kwonekittat ngka kung ana manna okorronno oka ngka kung mpomma, Kapik kulluk akkina. <sup>13</sup> Lon ila mpakorronno okkot ana ilanokkot na'ran woul ioc-cokothe lon loIeccuo wokat itti mpammienon nakucci. Nockikinthin lon elli ila mpokkothe nanon moloko.

<sup>14</sup> Mpongothe itti mpappainenon othikkie ma'ri m'rapuruk, mpakorronno appammienon. Mpakarrnnangkot a'rupu ianon thouu anaruk mpangothenon. Nyukul inyarran nyakorronno ethet oththangon a'rupu anaruk oththangon akkethet nyukul inyarran a'rupu. <sup>15</sup> Mpopirat noka itti mpakkinthet non lon appik iloporot ana likkoik ere amma mpongothenon kannan anon okorronno on-gathin kannani? <sup>16</sup> Opilingon nti ianon thi're itti mpokat anokorronno ommienon. Anaruk opilingon thokat akin opri mpokat anokkot ngre nthu'ran ana ammikkot non. <sup>17</sup> Mpokkiethenon lon lokithak nul iapmpothiilenthet noni? <sup>18</sup> Mpattakiet oThithhoc cik itti akwainenon ana

mpothiothok okin opang ponnon. oThiththoc ponekothe non alap'reki? Onin thakorronno ommakot katharken llon lulukkui? <sup>19</sup> Onon thikko thame itti onin thokat anin orrot noka kini? Annoka ittina onin thokat anin eret tokit koKapik ammakka ul woMiccie ana lon ilaniin thokkothe appik othakka itti alopo'rienon than. <sup>20</sup> Akka mpapelle akka anathiot non ngkathar ika mp'rat itti onon thikkoik ngngin ana mpapelle akka annathiohtin ngkathar ikanon th'rat itti nthiothin ngngin. Mpapelle akka atha'retto okaik ana thonyira ana thocungkaro ana therettot ana thipot ka thoura ana okorronno occikarot. <sup>21</sup> Mpapelle akka amma mpapprainenon attang, ana Kapik karpethin cik tokit kon. Ana mpipo thiak akka opilingon thoppot thakorrno opa'rine lon len cik ilokithak. Onon tharthuk opa'rine lon ilokithak cik, tha'ro nul nuthuk ana thopo'ra than ana opa'rine thothia cik.

## 13

### *Lon ilocothothe*

<sup>1</sup> Ca'ri cin enci ic'rapuruk inenni ampaththomirikot nanon. Ana lokurrakot iatham itti, "Othakka itti alon oka icat lonu itti limmako nul we'ra ana manna w'rapuruk ngkit." <sup>2</sup> Mpi'rethe okkwion ithakkot lon ilokithak lon lonthomat ca'ri ica mpaththomirikot nanon noma'ri ime'ra imeot. Ana inenni mpappi'ret kin lon lonthomat attang ampella ana opilingon ammakka mpi'ret noma'ri imeot, itti noma'ri imanthan mpakorronno okorronno okkwion ithokkothe lon ilokithak noma'ri imeot ana inenni <sup>3</sup> inakka onon thaik thipitto lon ilakene itti oMiccie paik pere nthu're thin. Kwakannoka pommangka itti kwakkot ngre ianon anaruk kwopo'rot than ianon.



<sup>4</sup> Othakka itti aron ina itti kwokat pokkuttathe ere kwom-mangka anaruk inenni kwokkot cik mpu'ran poKapik. Ammakka menik onin cakuruk thommangka ilon lung anaruk mpu'ran poKapik onin thakkoik inaththut anin orekinenon.

<sup>5</sup> Nenekke ka kon annokathaccekat tit kicce, annokatha itti amma nthaik ithocokot lon nomikit. Onon thomma amma oleccuo oMiccie paik ianoni anaruk amma onon thommat lon lothennekke? <sup>6</sup> Ana onon thina itti onin thakorronno omma lon lothennekketta. <sup>7</sup> Ana inenni onin tha'rane Kapik nga'rama itti anon okorronnokkot lon ilokithak aththik. Okorronno oka itti aul imma itti thennekketta thokat thoprot, anaruk othakka itti annokkot lon iloprot antoka manna itti onin thommat lon lothennekketta. <sup>8</sup> Akka onin thakorronno okkot lon l'rek aththik ilakitto lon ilaik icat, anaruk onin thakkot lon ilaco'rot lon ilaik icat. <sup>9</sup> Antoka manna itti onin thommangka anaruk anon oka thopo'rot than ana onin tha'ranenon nga'rama othakka itti annopo'rothan kannan. <sup>10</sup> Ilen akka anokurrine non lon elli ampella othakka itti amma mpaat anokorronno a'retto nanon mpu'ran ipaleccuo pethin. Akka ngili iaoleccuo pethin itti mpupothonon ngngin ana okorronno oka itti mpapettot non cik ngngin.

### *Thomicco ithacothot*

<sup>11</sup> Pangkingon, ittina p'rin mpaik paththe nanon. Nopira noka ana okkot lon iloporot ana opo'rathan ana erekettot. Nikkoik llon loporot. Ana Kapik kothongarot ana kothomicco kaka nanon. <sup>12</sup> Nomiccaro nthongarot thoKapik. <sup>13</sup> Ul woKapik iupupure appik waik wamicconon. <sup>14</sup> Athoporot tholli wonnon oleccuo oMiccie ana thongat thoKapik ana thoka tothun ngKanang ikupupure oka nanon appik.

Lumun  
Lumun: Lumun (Bible)

copyright © 2020 Wycliffe Bible Translators, Inc.

Language: Lumun

Contributor: ECS Diocese of Khartoum Translation Department

This text box needs to have content for PT9 to upload is to the DBL.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 8 Feb 2022

b9cb69ce-3694-5d9f-bda5-4a2243fae000